

N momënt por recordé le jonn Merch Dapunt da Sotrú

77 agn do ch'al é gnü copé, él gnü benedí
a Kortsch n monumënt dediché al jonn de Badia

Tratan la secunda vera dl monn â Merch Dapunt da Sotrú refodé le joramënt a Hitler. Por súa „infedelté“ él gnü copé dai nazisc ai 29 d'agost dl 1944. Scemia ch'al é passé tröc agn, se recorda tröc ciamó de chël jonn de Badia, vitima dla ditatöra, mo dantadöt n ejëmpl de vita. Èl è na porsona che â sintí d'avèi la liberté da dí de no ales iniustizies dl nazism.

Sön iniziativa dl artist Heinrich Lechtaler y dl Consëi de Formaziun da Kortsch, le pice paisc püch dalunc da Solaneres (Schlanders) olache le jonn è gnü copé, él gnü isé n pice anteriöl por recordé le jonn de Badia. La sabeda, ai 25 de setëmbër, él gnü tigní na picia festa, olache chësta opera é spo gnüda benedida dal degan de Kortsch, Matthew Kozhuppakalam.

Familiars y conescënc de Merch Dapunt y deplü porsones dla Val Badia che se recorda ciamó de èl á tut pert a chësta iniziativa che á fat ponsé do y che á ince descedé tröpes emeziuns. Josef Telser, paur da Kortsch de 88 agn, è tl 1944 ciamó n pice famëi. Èl á odü coche soldas y ofiziers â condüt adalerche le jonn y l'â stlopeté y á cunté de coch'ara è jüda. Adolphine Lechtaler è inlaota na picia möta de 10 agn. Súa uma l'â metüda da ciaré sura dla fossa de Merch Dapunt. Ara è ma na te möta, porchël minân che degügn n'ess dit nia sc'ara ess ciaré dla fossa de n „traditur“. I gragn che ess ince ion fat chël sorvisc se temô indere da gní instësc acusá y da fá



da man ciampa: le degan da Kortsch, Matthew Kozhuppakalam, siur Sepl Granruaz, l'artist Heinrich Lechtaler, l'ombolt de Badia Iaco Frenademetz y l'ombolt da Solaneres Dieter Pinggera.



Dessura: Pitöra dl anteriöl dediché a Merch Dapunt.

Merch Dapunt da Sotrú (1923-1944)

la medema fin: al è de ri agn y dantadöt i *Dableiber*, chi che n'â nia opté por jí fora tl *Reich* tl 1939, messâ se temëi ch'ai l'ess paida de val' vers.

Siur Sepl Granruaz, degan de Badia da n iade, â ince conesciü Merch da Sotrú che è sté famëi sö Paracia, olache siur Sepl è da ciasa. Te so intervënt a Kortsch, á siur Sepl impröma cunté valch dla vita de Merch, n jonn da orëi bun y che fajô ion matades. Èl á splighé che súa mort é dër dessigü n evënt tragic, da desplajëi. Porimpó él important da odëi fora l'ejëmpl che le jonn nes dá ciamó aldedaincö. Da bun cristian âl odü la salvëza tla vita eterna impormetüda da Chël Bel Dî y avisa porchël âl sintí d'avèi la liberté da ti dí de no a Hitler, da ti dí de no ales iniustizies di nazisc. Chësta liberté è por èl plü importanta co la vita sön chësc monn. Siur Sepl á ince dit ch'an dess odëi fora dantadöt le bun de ci che é sozedü, l'ejëmpl de vita cristiana de n jonn che odô la salvëza te Chël Bel Dî.

L'ombolt Iaco Frenademetz á rengrazié le Consëi de Formaziun da Kortsch y l'artist Heinrich Lechtaler por l'iniziativa che recorda le jonn dla comunité de Badia. A inom dla familia á Wilma Ploner da San Ciascian rengrazié duc canc por avëi recordé Merch Dapunt y dantadöt ince Adolphine Lechtaler che á albü le coraje da ciaré de súa fossa, riscian poester ince la vita.



La cortina di soldas de Valparola

Söla strada danter San Ciascian y le ju de Valparola mostra na tofla le tru da bosch che vá sò dala cortina di soldas. Impröma ê la cortina partida sò te döes seziuns, despartides dal tru nr. 18 d'aldedaincö: öna na pert ê dedicada ai soldas todësc y l'atra (majera) pert ai soldas austro-ungarics pro chi ch'al aldî ince nüsç antenac. La cortina y les fosses di soldas todësc é plü tert gnüdes tutes demez: al resta ma plü val' crusc o toc dles vedles fosses metüs sò püch dalunc dala cortina austro-ungarica che é gnüda mantignida cina aldedaincö, scemia che les crusc de lëgn é ma plü n simbol che recorda i soldas morc ailó sopolis. Da inlaota él resté la picia capela, la crusc de pera dla cortina y la pera de fossa de n tomé austriach che á lascé zoruch la fomena y set mituns. Dlungia la crusc dla cortina él n pice monumënt de pera cun i inoms de nù pioniers bavaresc tomá ai 29 d'agost dl 1915. Aladò dl diare de vera dla compagnia de pioniers bavaresc nr. 106 é chisc soldas tomá por n colp d'artilaria che â toché la baraca olach'ai ê de cuartier. Ci che restâ di corps spidiciá sò ê gnü sopolí te döes fosses tla cortina di soldas todësc.

Al scomenciamënt di agn Otanta ê la cortina dër ademal. La crusc é rosedada, la capela manaciâ da jí en rovina, la pera de fossa dl soldá de Vorarlberg Hohenegg tomé ai 6 de ma dl 1917 risciâ da jí en toc y la scritöra sön la pera dedicada ai pioniers todësc ê laurada jò dal tëmp y nia plü da lí. La spersa é gnüda tuta ite pro la pastöra da vardé i tiers y le post â oramai pordü la pieté che ti speta ai tomá. Porimpó gnò la cortina tres indò vijitada da jënt dl post y da escurscionisc che manifestâ demeztrú le dejider da renové la cortina. Tla finada éra jüda da ciafé le sostëgn finziar che jò debojëgn dal „*Volksbund Deutscher Kriegsgräberfürsorge*“, dales istituziuns locales y da porsones privates por ressané tl 1986 impröma la capela y da ti dé tl 1987 indò n pü' de dignité a döta la cortina. Incëria él gnü fat na si y banc da se senté y ponsé do a ci che chi soldas â döt fat para, a so destin cröde, a ci che la vera pó porté.

L'iniziativa y la coordinaziun di laurs é gnüda metüda tles mans dl ombolt dl Comun de Badia da inlaota Hermann Pescollderungg. Di laurs pratics s'â cruzié le hotelier Paul Wieser. An pó dí che l'opera é garatada bun y la picia ciampiana finanziada da Waltraud Pizzinini dl Hotel Teresa inviëia a recordé i soldas tomá y sopolis dailó amesa le bosch.